

雪橋詩話餘集

雲情詩話卷集

癸亥四月

雪橋詩話餘集

秦樹聲署



雪橋詩話餘集序

綜一代之詩以紀一代之事始於宋人計敏夫之唐詩紀事本朝厲太鴻沿其名而小變其例以編宋詩近人復用太鴻例編元明兩朝詩然名曰紀事實則詩多而事少若論詩而儼具史裁者前人蓋未有此體予勤館丈以良史才出爲外吏政變以後避地滬濱以著述自遣成雪橋詩話前後凡四編都四十卷每編自爲起訖自勝國遺民以至昭代名臣碩儒畸人逸士或以人存詩或以詩存人大率以詩爲經以事爲緯其最難者如舉一人之事每臚舉他人所贈詩以證其人之生平此

非博覽而彊記者不能想海上十餘年露鈔雪纂其用力至勤且苦而三百年中世運盛衰治術之升降人才之消長讀此書舉可窺其崖略信乎一代之良史而不當以詩話目之矣子勤入翰林余已歸里歲癸巳以事至閩一見欽其淵雅其後再見於金陵辛亥後不恆通問但知其閉戶著書癸亥子勤奉 召入南齋爾後遂朝夕相見因得窺此書之全自頃世變日亟一時宿學之士多憂傷憔悴佗僚而不自聊子勤獨韜光晦精以自謀其不朽齒逾六十而鬢髮才斑其所養之充又有餘於著述之外子勤於是不可及矣丙寅正月閩縣陳

寶琛

雪橋詩話餘集序

二求恕齋

雪橋詩話餘集序

昔東發先生謂名臣言行錄雖雜取傳記之言然諸賢出處之本末備矣豈獨諸賢凡國朝盛衰之故亦莫不隱然備見其間史無定體書隨事爲篇春秋紀年以書班馬以來分紀傳此錄亦朱文公陰寓本朝之史斯言也吾嘗讀而遽之留垞居士所爲詩話意不專主言詩其於前言往行紀之特詳而盛衰大要亦略可攷見其殆有私淑之愔者乎承幹旣爲刻三集壬戌之秋復出餘集八卷見示猶前志也汗青甫竟居士以癸亥三月遂北歸之願尋所謂雪橋者旣先疇舊德之都非而酈

亭丙舍松柏爲薪釣遊無所愧然不知人間之何世蓋
去國二十五年都人士衣服不貳出言有章之風邈乎
不可復見矣郵筒往還輒寄慨於荆舒之新法章蔡之
紹述致有南遷之禍居士孤懷閱識世多未之知而獨
稱其詩話之繁富何耶校訂旣訖書此以爲之序龍集
乙丑三月吳興劉承幹

雪橋詩話餘集卷第一

求恕齋叢書

遼陽楊鍾義撰集

吳興劉承幹參校

施尙白觀嚴水子畫人物引山陰高士陳章侯開闢畫
院無虎頭左手執杯右執筆十指酒氣生十洲尤工人
物作殊態雕鏤瑣屑窮纖芥詭形奇狀人盡驚素壁中
宵走光怪興闌箕踞時捫蝨尺幅千金不可得晚傳二
子早升堂吮墨含毫向侍側山子過從憶鑑湖淋漓染
翰多歡娛五年以後水子至筆勢不與章侯殊冥搜慘
淡迫精妙敲側江皋連海嶠芙蓉薜荔雜連蜷帝子嬋

娟山鬼笑名高薄俗復何益能事傷心爭促迫乞畫如山乏酒錢仰視高天岸赤幘水子名湛山陰人

長洲楊補無補號古農工詩畫孝謹重然諾素善徐文靖馬阮修怨購文靖急詣楊龍友責以大義得解隱鄧尉山數年卒王貽上詩布衣曾說楊無補筆墨風流又一時留得永嘉遺跡在殘山賸水也堪思龍友令永嘉無補爲畫小幅寫所見也

閩中遺老孫學稼君實有蘭雪軒集散失未及刊陳惕園爲之蒐錄有聖湖孫先生亡詩拾遺記翁白未青有梅莊遺草丁之賢德峰朱國漢爲章詩何梅合刊爲綴

安二布衣詩陳昂白雲有白雲集皆近體林古度爲之
刊定詳池北偶談謝枚如論詩絕句有云高人想見孫
君實南過孝陵獨詠詩肯向遺編尋合璧後身猶有惕
園知未青感遇多哀怨寂寞丁朱有淚痕但使歌聲出
金石閉門風雪布衣尊五律平生七百首白雲槁餓老
鬢眉蘆花孤鶴哀吟夜誰問當年林茂之

老學菴筆記嘉興人聞人茂德名滋老儒也喜留客食
然不過蔬豆而已郡人求館客者多就謀之又多蓄書
喜借人自言作門客牙充書籍行開豆腐羹店予少時
與之同在勅局爲刪定官談經義滾滾不倦發明極多

尤邃於小學云王西樵嘗謂孫無言有嘉興老儒之風
孫焦穫懷友詩最憶吾宗野鶴姿逢迎處處足相知只
今名士牙行少能似嘉興儒者誰王阮亭謂無言遂已
長夜海內風雅大寂寞矣讀此掩卷久之兼復痛我西
樵也其無言病起見過云相過何太早杖履尙艱難木
落江風大家貧野服單耽詩情不減取友法終寬莫更
逢人拜淹留且考槃形容今漸改學道竟何年病廢抄
書手囊空買藥錢黃山頻入夢青眼受誰憐故舊凋零
盡相看更惘然無言將歸黃山焦穫因極稱住山之樂
以勸其行竟未能踐

秀水項胥樵聖謨入 本朝以布衣老順治壬辰追憶
平生師友作尙友圖首董元宰次陳眉公又次魯岡卿
魯竹史釋秋潭末一人卽胥樵時惟竹史尙存何天根
爲文河南作歌有云項君項君名賢徒晚節猶託殷餓
夫一時邢米皆千古愁絕當年張瑞圖

彭躬菴序獨漉堂稟謂古人詩之集大成者必推杜陵
其大者無間然矣而集中丐求得失喜而奉諛怒而譏
調如是者時亦有之後代山人詞客之盲貪者每竊撫
爲口實使杜陵見之必悔爲俑不可作今人詩吾甚閔
吳梅村梅村撫今傷昔俯仰流連其憂慚悼悔之意時

時逗露欲覽者知其由來而華美太盡終不及杜其論
極槁躬菴講學易堂發學者之病一言以蔽之曰虛與
亭林說略同

屈翁山哭汪扶光詩一代遺民金粟佛兩朝高士雪菴
僧又云未應列在高僧傳公是郎官復孝廉扶光歙人
名曰沐崇禎癸酉舉人官武曹甲申遁跡入浦城爲僧
名宏濟同時詩僧有道盛字覺浪祝髮夢筆山寺翁山
及潘稼堂皆尊爲大導師詩如清明微雨後花鳥亂飛
時苦竹長遮徑高松自護關朱竹垞亟稱之與同邑潘
遠雪生唱和如慧遠之於宗雷雪生旣老無子亦逃于

禪因自號雪僧

費滋衡姑蘇詩路入雲巖路幾層遺民大半續傳燈五湖秋草無邊寺老盡前

朝八百僧

王茨菴贈人句云青史自應常注目白頭不合更低眉
陳元孝送林叔吾入都云好熟黃金臺下路馬蹄終要
自家行均見交道

明祁門汪子祐受夫有石西集曾孫伯薦字士倩崇禎
選貢鼎革不就司職有崇禮堂詩句如樂兼閒是福
貧以醉爲家差勝

王貽上謂陳士業徐巨源爲南州眉目士業李太虛席
上觀女樂云雲閒歌管已成塵淚灑荒煙十五春又聽

貞元供奉曲尊前驚見玉堂人幾年圖史水雲鄉元老
翩然羽客裝只有情緣今尙在綠波影底看西廂蓋諷
之也

歙人汪韜字六奇甲申後棄諸生爲僧號漸江上人畫
宗雲林入逸品張公東詩家國滄桑感寂寥自磨殘墨
寫金焦松根礪硯多奇節石骨嶙峋訂久要大地林巒
呈畫稿諸天花雨洗詩瓢閒披古衲歸何處白嶽黃山
路未遙

嘉定侯汭柅園與弟洵涵從弟演潔澗稱上谷六龍柅
園句如詩以苛求細棋逢小劫遲遜卽趨時術貧爲出

世資語極雅鍊研德和拒園兄南野詩云去住蕭然好
息機花時遙掩白雲扉林深尙有驚鳥繞戍近頻看戰
馬肥新曲乍調歌拍換舊游重到酒壚非阿兄病骨今
無恙珍重樓東把袂衣拒園南野雜詩有云老圃春來
事漸工梅言竹笑此宵同深檐穩受牀牀雨破壁虛吟
瑟瑟風萬事自休茅屋外先生獨醒布衾中煙雲四野
天如墨賸得寒繁一穗紅南野者乙酉避兵小築名曰
惠甯莊丁亥後至庚寅始復故居研德舊莊詩云繞樹
頻驚月影寒北風何意送歸翰劇憐松菊成荒徑聊喜
門庭得舊觀遠害卻嫌爲客近還家渾似越鄉難江東